

**Qinngornerit ioninngortitsisartut pillugit aamma qinngornernut illersuuteqarnissaq
pillugu Inatsisartut Inatsisaannut nr. x, ulloq xx. xx 2015-imeersumut siunnersuut.**

pillugu

Ilaqutariinnermut Peqqissutsimullu Ataatsimiititaliap isumaliutissiissutaa

Siunnersuutip aappassaaneerneqarnissaanut saqqummiunneqartoq

Ataatsimiititaliaq kingullermik suliarinninnermini ukuninnga inuttaqarpoq:

Inatsisartunut ilaasortaq Tillie Martinussen, Demokraatit, siulittaasoq

Inatsisartunut ilaasortaq Agathe fontain, Inuit Ataqatigiit, siulittaasup tullia

Inatsisartunut ilaasortaq Jess Svane, Siumut

Inatsisartunut ilaasortaq Laura Tàunâjik, Siumut

Inatsisartunut ilaasortaq Ineqi Kielsen, Siumut

Inatsisartunut ilaasortaq Ane Hansen, Inuit Ataqatigiit

Inatsisartunut ilaasortaq Mimi Karlsen, Inuit Ataqatigiit

UKA 2015-imi ulloq 30. september 2015-imi siullermeerinerup kingorna siunnersuut ataatsimiititaliamit sukumiisumik misissorneqarpoq.

1. Siunnersuutip imarisaa siunertaalu

Siunnersuutip imarisaa siunertaalu oqallinnermi qularineqalerlaruarnerat ataatsimiititaliamit maluginiarneqarpoq. Isumaliutissiissummi matumani ataatsimiititaliap paasinarsisinniassavaa.

Qinngornerik ioninngortitsisartunik atuinermut sunnertinnermullu inatsit siunnerfilimmik atorneqartarpoq, inatsisip atuuffigisaa atorneqanngippat imaluunniit oqartussaaffgineqalersimannngippat. Pineqartut suulluunniit qinngornernut ioninngortitsisartunut illersorneqarnissamut tunngasut qulakkeerneqarnissaat inatsimmi siunertarineqarpoq. Qinngornerik ioninngortitsisartunik eqqugaanissamut atatillugu innuttaasut eqqarsaatigineqarnissaat suliniuteqarfingineqarnissaallu inatsimmit qulakkeerneqassaaq. Kalaallit Nunaanni avatangiisit pillugit inatsimmi ilanngunneqarsimasut matumani ilaatinneqanngillat.

Peqqinnissaqarfimmi aamma kigutileriffinni, imaani sullissiffiusut il.il. kiisalu assersuutigalugu ilisimatusarluni ilisimasassarsiorerit aamma assersuutigalugu namminersorlutik inuutissarsiuteqartut inatsisisstatut siunnersummi ilaatigut maleruagassiunneqarput. Matumani ataatsimut isigalugu innuttaasut napparsimasullu katsorsarneqarnerminni qinngorernik ulorianartorsiorsinnaasunut tunngatillugu. Tamanna imatut paasineqassaaq inatsimmi matumani malittarisassaliuunneqarput qinngorernut illersuinissamut, annertussutsinut nakkutilliinernut, annertussutsinik killeqartitsinernut, uuttuisarnernut sullissinernut, nakkutilliinernut, uninngatitsineq atortullu ioninngortitsisartunik atuisut il.il.

Qinngorernut ulorianartunut illersuinissamut tunngasup Kalaallit Nunaanni ataatsimoortumik malittarisassiuunneqarnissaa ullumikkut amigaataavoq. Napparsimavitsinni kigutilerivitsinnilu napparsimasunut qinnguartaammik atuinermut atatillugu Kalaallit Nunaanni inatsimmi maleruagassiuisoqarsimanngilaq. Peqqinnissaqarfimmi sulisut katsorsaasutut suliaqartut sulinermi avatangiisit pillugit inatsimmit illersugaapput, napparsimasulli illersugaanngillat. Pissutsit taakku mittarfinni timimut qinnguartaanermut atuinermi atuupput. Sulisut scanerisartut sulinermi avatangiisit pillugit inatsimmi illersugaapput, angalasut illersugaanngillat. Inatsisisstatut siunnersummi matumani ilaatigut siunertarineqarpoq tamatuma maleruagassiunneqarnissaa.

Inatsisisstatut sinaakkutissaq nutaaq Peqqinnissamut Naalakkersuisoqarfiup akisussaaffiisa iluini Kalaallit Nunaannut attuumassuteqartunut ilaatigut **maleruagassiuisoqarnissaa** siunertarineqarpoq. Suliassaqarfinnut allanut sukumiinerusumik killeqartinneqarnissaa siunissami nalunaarusiassami erseqqissarneqassasoq inatsisisstatut siunnersummi ataatsimut oqaaseqaatini atuarneqarsinnaavoq.

1.1 Inatsisip aatsitassarsiornermut attuumassuteqarnera

§ 1. Imm. 5-imut Naalakkersuisut oqaaseqataanni ima allassimasoqartoq ataatsimiititaliamit maluginiarneqarpoq:

“Aatsitassanik sammisunut tunngatillugu ileqqoq atorneqartoq tassaavoq oqartussaasut ataatsimoortumik ataqtigiittumik suliaqartarnerat, tassani ingerlatsineq aatsitassanut inatsit tunngavigalugu ingerlanneqartarpoq pissutsit aamma mianerisassat attuumassuteqartut ataatsimoortumik aamma ataqtigiissaakkamik isummerfigineqartarlutik, tamatumunnga ilanngulligit isumannaallisaaneq, peqqissuseq aamma avatangiisit. Tamanna aalajangersaavigineqartarpoq manna tikillugu ileqqusoq malillugu, tassa Naalakkersuisut Aatsitassanut Ikummatissanullu Inatsit tunngavigalugu akuersissutinik nalunaaruteqarnerminni akuersissutinut tunngatillugu pissutsinut tamanut atugassarititaasunik aalajangersaasinnaammata. Aatsitassarsiorermik ingerlatsinerit akuersissuteqarneq

tunngavigalugu ingerlanneqartut, ingerlanneqartussaapput nunani tamalaani pitsasumik iliornissamik akuerisaasoq tunngavigalugu, tassani pissutsit assigisaasa iluanni.

Tamanna imatut paasineqassaaq qinngornernut illersorneqarnissamut tunngatillugu suliffeqarfiiit iliuuserisaat inatsisissatut siunnersummi matumani maleruaqqusat malinnerisa saniatigut, taamatuttaaq nunani tamalaani akuerisaasut ileqqut pitsasut malillugit tamanna ingerlanneqassasoq. Tamatumani assersuutaasinnaapput IAEA-mi ilitsersuutit aamma maleruaqqusat uranisorfinni sulinermut tunngatillugu.

Akuersissutini atugassarititaasunik aalajangersaanermut tunngatillugu, tassa isumannaallisaanermut, peqqissutsimut aamma avatangiisinut tunngatillugu aatsitassarsiorluni ingerlatsinernut ataasiakkaanut ataatsimoortumik piviusumik naliliineq apeqquaassaaq, kisianni inatsisissatut siunnersuutip piumasaqaatai qinngornernut ioninngortitsisartunut aamma qinngornernut illersorneqarnissamut tunngasut minnerpaamik eqortinneqarsimassapput.”

Aatsitassarsiornermi ingerlatsinernut tunngatillugu **akuersissutit aamma ingerlatsinerit** matumani Aatsitassat pillugit inatsimmi **taamaallaat** maleruagassiunneqarput. Aatsitassarsiorfinnut qinngornerik ulorianartunik (radioaktive materialer) piiaffioratarsinnaasuni akuersissutinik tunisisoqaraluarpat tunisisoqanngikkaluarpalluunniit siunnersummi matumani maleruagassiunneqanngilaq.

Akerlianik Ioninngortitsisinnaasunik passussinermi illersuutissanut tunngasut nalinginnaasumik inatsimmi atuuttumi maleruagassiunneqarsimannngitsut **minnerpaamik inissinneqareersimassapput**. Tamanna aatsitassarsiorfinnut qinngornerik ulorianartunik piiaffiusinnaasuni sulinermi aamma atuuppoq.

Inatsisissatut siunnersummi § 1. Imm. 5-imi allassimavoq:

“Aatsitassarsiornermi ingerlatsinernut tunngatillugu akuersissutit aamma akuerineqarnerit Aatsitassat pillugit ingerlatallu tamatumunnga pingaarutillit pillugit Inatsisartut Inatsisaat (Aatsitassat Ikummatisanullu Inatsit) tunngavigalugu malittarisassiuunneqassapput. Akuersissutini aamma akuerineqarnerni taakkunani inatsimmi matumani piumasaqaatigineqartunit annertunerusunik piumasaqaateqarnissanik aalajangersaasoqarsinnaavoq.”

Ioninngortitsisinnaasunik passussinissamut pisinnaatitsissut aatsitassarsiornermi suliniutinut akuersissutit Aatsitassaqarnermut Naalakkersuisoq annertusisamik sakkortunerusumillu inatsimmi matumani mattunneqanngimmatt aalajangersakkani qulaani taaneqartumi naqissuserneqarpoq.

1.2 Inatsisip nunat tamalaat akornanni isumaqatigiissutaannut attuumassuteqarnera

Qinngorernik ioninngortitsisartunik sulisut illersorneqarnissaat pillugu Nunat Tamalaat Isumaqatigiissutaat nr. 115 “International Labour Organization (ILO)” naapertorlugu inatsisissatut siunnersummi Kalaallit Nunaata ilanggussinnaanera tunngavissaqarluartoq siunnersummi nalinginnaasumik oqaaseqaatini takuneqarsinnaavoq. Isumaqatigiissutip imarisaa taanna malinneqassappat qinngorernut ioninngortitsisartunut suliaqartut illersorneqarnissaannut nunat ilaasortaasut malittarisassiornissaat aaqqissuussinernullu aqtsinissaat piumasaqaataavoq. isumaqatigiissutinut allanut ILO-mi isumaqatigiissut sanilliunneqassaaq, tassani Kalaallit Nunaannii uranimik annissuinissamut sinaakkutissanik pingarnernik pisortatigoortumik pilersitsisoqarnissaa siunertarineqarluni.

Taamaattorli siunnersuutip matuma Kalaallit Nunaanni isumaqatigiissutit tulleriaarneqartut allat Kalaallit Nunaanni atortuulersinneqarnissaannut inatsisissatut siunnersuut manna tunngavissiinersoq nalinginnaasumik oqaaseqaatini ersarissumik allassimanngilaq. taama inissisimasoqarnera ataatsimiititaliamit ilimagineqanngilaq. Peqqinnissamut Naalakkersuisoq allatut isumaqaruni siunnersuutip matuma aappassaaneerneqarnissaanut akissuteqaatitut allakkiamut ilanngunneqarnissaa qinnutigineqarpoq.

1.2.1 siunnersuutip siunertaa pillugu eqikkaaneq

Qinngorernut Ioninngortitsisinaasunut peqqinnissaqarfimmi allanilu innuttaasut isersimaffigisartagaanni imaluunniit katsorsarneqarfigisaanni atorneqarnissaata toqqortarineqarnissaatalu maleruagassiuunneqarnissaa matumanilanganngullugu inatsisissatut siunnersuut pingaarnertut arlalinnik siunertaqarpoq. Aatsitassarsiornermi suliaqartut sulinerminni qinngorernik ioninngortitsisinaasunik ulorianartorsiortinnejqarsinnaasut illersorneqarnissaasa piviusunngortinnejqarnissaanut tunngatillugu qinngorernik annertussusiliinerit il.il. annerpaaffissalerlugu inatsisissatut siunnersummut aamma ilanngunneqarput. Taamatuttaaq qinngorernik ioninngortitsisinaasunik suliallit illersorneqarnissaat pillugu Kalaallit Nunaata International Labour Organization (ILO) konvention nr. 115.-imut ilanngunnissaanut siunnersuut tunngavissiivoq.

1.3. siunnersummi nalinginnaasumik oqaaseqaatit pitsaassusaat pillugit inaarutaasumik oqaaseqaatit

Inatsisissatut siunnersummi oqaaseqaatit nalinginnaasut kipisaqattaarsorinarp. Inatsimmi siunertarineqartut ataasiakkaalugit erseqqissumillu immikoortukkaarlugit kapitalikkaalugillu tulleriaarlugit peqqissaarussamik nalinginnaasumik oqaaseqaatini nassuiarneqarsimagaluarpata annertuumik iluaqutaasimassagaluarpoq. Akerlianik nalinginnaasumik oqaaseqaatit ilannikutut isikkoqarput atuartussanillu paasissutissat paasiniaqqissaarneqartariaqarlutik. Inatsisissatut siunnersuutini nalinginnaasumik oqaaseqaatit suliarineqarnerini siumut isigisumik pisarialimmik peqqissaarullugit suliarineqartarnissaat ataatsimiititaliamit kaammattutigineqassaaq.

2. Siunnersuutip Inatsisartuni siullermearneqarnera

Ataatsimiitaliami amerlanerussuteqartut Siumup, Demokraatit Atassutillu siunnersuutip piviusunngortinnejarnissaa tapersorsoraat siunnersuutip siullermearneqarnerani takuneqarsinnaavoq.

Qinngorernik ioninngortitsisartunik qinngorernullu illersuutit pillugit siunnersuummik matuminnga Naalakkersuisut saqqummiussaqarmata Naalakkersuisooqatigii Siumut, Demokraatit Atassutillu naammagisimaarpaat.

Siunnersuutip illersorneqarnissamut siunertaata siunnersuut tapersorsoruminartungortippaa. Taamaattorli naalakkersuisuutitaqartut siunnersuutip pisariaqartinneqartumik sukumiisumik ataatsimiitaliami suliarineqarnissaa kissaatigaat.

Uranimik piaanissaq partiip akerlerigaa aammalu Kalaallit Nunaanni qinngorernik ularianartunik tunisassiulersinnaanermut siunnersuut aqquissiuussissasoq Inuit Ataqatigii erseqqissaatigaat. Tamanna pissutigalugu siunnersuut Inuit Ataqatigii tapersorsinsinnaanngilaat.

3. Tusarniaanermi akissuteqaatit

Naalakkersusoqarfiiit tamarmik, KANUKOKA, Nunatsinni Nakorsaaneqarfik, Kalaallit Nunaanni Politimesteri, Nunatta Eqqartuussivia, Nunatsinni Eqqartuussivik, Kalaallit Nunaanni Rigsombudsmandi, Sulisitsisut, Kalaallit Nunaanni Uumasunut Nakorsaarfik aamma Inuussutissalerinermut Oqartussaaffik, Sullivinnik Nakkutilliisoqarfik, Peqqinnissamut Utoqqarnullu ministereqarfik (Sundheds- og Ældreministeriet).

3.1 Tusarniaanermut ataatsimiitaliap oqaaseqaatai

Tusarniaanerup ingerlanneqarneranut ataatsimiitaliaq oqaaseqaatissaqanngilaq tusaatissatullu tigullugu.

4. Apeqquteqaatit ataatsimiinnerlu

Siunnersummut tunngatillugu apeqqutit aalajangersimasut eqqarsaasersuutillu qulaarneqarnissaat siunertalarugu ilisimatitsilluni ulloq 10. november 2015 Peqqissutsimut Naalakkersusoq ataatsimiitaliamit ataatsimeeqatigineqarpoq.

Ataatsimiitaliap qaaqqusissuttaa apeqqutitalik isumaliutissiisummi **Ilanngussaq 1-itut** ilanngunneqarpoq. Ataatsimiitaliap apeqqutaanut akissutigineqartut Peqqissutsimullu Naalakkersuisup qisuarialatai isumaliutissiisummi **Ilanngussaq 2-tut** ilanngunneqarput.

Itisiliissutaasumik akissuteqaat tamakkiisumik **Ilanngussaq 2-tut** ilanngunneqartoq ataatsimiitaliamit qujassutigineqarpoq

Aatsitassat pillugit inatsit naapertorlugu aatsitassarsiornermi ingerlatsinermi tunniussinerit akuersinerillu maleruagassiuunneqartartut ataatsimiititaliamit maluginiarneqarpoq, maleruagassiornerlu taanna nunat tamalaat akornanni periuserineqartartoq pitsaasoq akuerineqarsimasorlu tunngavigalugu suliarineqassalluni.

Uranisiorfinni sulinermi maleruagassat eqqartorneqartillugit nunat suut periusaat Naalakkersuisut innersuussinnaaneraat apeqqummi 5c)-mi ataatsimiititaliamit paaserusunneqarpoq. Aatsitassanut Naalakkersuisumut tamanna ataatsimiititaliamit paasiniarneqarsinnaasoq akissuteqaammi innersuussutigineqarpoq. Ataatsimiititaliap apeqquteqaataanut 5c)-mut akissuteqaat siunnersuutip aappassaaneerinissamut tunniunneqarnissaa ataatsimiititaliamit qinnutigineqarpoq.

5. siunnersuutip aningaasatigut kingunerisassai

Siunnersuutip akuerineqarneratigut aningaasatigut kingunerisassat siunnersuummi nalinginnaasumik oqaaseqaatinut ilanngunneqarput. Tunngavilersuutit pigineqartut naapertorlugit ataatsimiititaliaq allatut naliliinissaminut tunngavissaqanngilaq. Naalakkersuisut apeqqut tamanna peqqissaarullugu misissorsimassagaat siunissamilu aningaasatigut kinguneqartinneqarnissaata ilimagineqannginnera ataatsimiititaliamit tatigineqarpoq. Siunnersuutigineqartoq naatsorsuutigineqartut paarlattuanik naatsorsuutigineqartunik amerlanerusunik pisortat karsiannut aningaasartuutaanerussagaluarpat aningaasartuutit taakku aningaasaliissutissatut immikkoortinneqareersut iluini akilerneqarsinnaapput taamaattoqassappallu suliniutinik allanik tulleriaarinermi tunulliussisoqartariaqassaaq.

Maleruagassap matuma piviusunngortinneqarneralu Nunatta Karsianut aningaasartuutaassammat ilanngussaq 2-mi apeqqut 4-mi paassisutissiissutigineqarpoq. Assersuutigalugu Statens Serum Institutimik suleqateqarneq aningaasartuuteqarnerulerermik kinguneqassaaq. Nakkutilliinermut siunnersuinermullu aningaasartuuteqartoqassaaq. Taakkulu ukiumut 500.000 kr.-inik naleqassapput.

6.ataatsimiititaliap inaarutaasumik oqaaseqaatai

Qinngorernut illersuinissamut maleruagassiornissap ingerlanneqarnissaa ataatsimut isigalugu ataatsimiititaliamit naammagisimaarneqarpoq. Peqqinnissaqarfimmi, kigutileriffinni assersuutigalugulu namminersorlutik inuutissarsiortunut tunngatillugu qinngorernut ionnninngortitsisartunut maleruagassiornissaq pisariaqarpoq pitsaasuullunilu, taamaaliornikkut sulisut innuttaasullu illersorneqarsinnaaniassammata. Pineqartumilu inatsisiliornerup qanoq iluseqarnissaa ataatsimiititaliami isumaqatigiinngissuutaavoq.

7. Ataatsimiititaliap inassuteqaatai

Ataatsimiititaliami amerlanerussuteqartut Siumut aamma Demokraatit siunnersuut pillugu ima oqaaseqarput:

Siunnersuut ilusimisut iluseqartoq Siumup Demokraatillu tapersorsorpaat. Pineqartup maleruagassiuunneqartariaqarnera pisariaqartutut nalituutullu partiit taakku isumaqarput. Inuit qinngorernik ioninngortitsisartunik suliallit aamma passussisuusinnaasut illorsorneqarnissaat tunngavigalugu inatsisip taassuma piaartumik inissinneqarnissaam amerlanerussuteqartunut pingaaruteqarluinnarpoq. Pineqartumut ataatsimut maleruagassiortoqarnissaam amerlanerussuteqartunit pissusissamisoortutut isumaqarfingineqarpoq.

Taama oqaaseqarlutik siunnersuutillu ilusimisut iluseqartillugu akuerineqarnissaam amerlanerussuteqartut inassutigaat.

Ataatsimiititaliami ikinnerussuteqartut Inuit Ataqatigiit siunnersuut pillugu ima oqaaseqaaqput:

Peqqinnissaqarfimmi sulisut aamma inunnut aatsitassarsiornermik suliallit illorsorneqarnissaat pillugu inatsisip avissaartinneqarnissaam pingaaruteqartoq Inuit Ataqatigiit isumaqarput. Siunnersuutip siullermeerneqarnerani paasinarsivoq uran pillugu naalakkersuisooqatigiit anguniagaat inatsisitigut periarfissinneqartoq. Danmarkimi inatsisit ataatsimoortinneqarnissaasa sulissutigineqarnerat inatsisit ataatsimut suliarineqarnerinut peqqutaatinneqarpoq. Tamanna tunngavigalugu peqqinnissaqarfimmi sulisut aamma inuit aatsitassarsiornermik suliaqartut inatsisip ataatsip iluani maleruagassiuunneqarnissaat Inuit Ataqatigiinnit akuerineqarsinnaanngilaq. Danmarkimi inatsit taama ilusilfersorsinnaavaat uranisiortussaannginnertik pissutigalugu.

Taamaattumik inatsit ilusimisut iluseqartillugu ikinnerussuteqartut akuerisinnaanngilaat itigartinneqarnissaalu inassutigalugu.

Taama oqaaseqarluni isumaliutissiisummilu oqaatigineqartunik paasinnilluni siunnersuut ataatsimiititaliap aappassaaniigassanngortippaa.

Tillie Martinussen

Siulittaasooq

Agathe Fontain

Siulittaasup tulli

Jess Svane

Laura Tàunâjik

Ineqi Kielsen

Ane Hansen

Mimi Karlsen